



schwaleny dnja 12.04.2014

## Změrcowski porjad Domowiny

### § 1 Powšitkowne

- (1) Zakład za džělo změrcowskeho wuběrka su wustawki a program Domowiny. Jeho džělo měri so na dodžerženje a skrućenje nutřkoorganizaciskich demokratiskich zasadow jednanja a na zachowanje prawa jednotliwego čłona.
- (2) Změrcowski wuběrk skutkuje k wujednanju zwadow. Změrcowske jednanje so jenož na zapodatu próstwu wjedže.
- (3) Změrcowski wuběrk je w swojich rozsudach njewotwisny. Čłonojo<sup>1</sup> změrcowskeho wuběrka wukonjeja swoju džělawosć njestroniče po najlěpšej wědže a swědomju. Wobdžěleni na jednanju maja winowatosć, na wujasnjenju naležnosće sobuskutkować.
- (4) Bjez přihłosowanja a dojednanja změrcowskeho wuběrka nima so wo naležnosćach wuběrka w zjawnosći rozprawjeć.
- (5) Změrcowske jednanje ma zasadnje prioritu před zawołanjom rjadnych sudnistwow. Zranjenje jednanskich postajenjow po tutym změrcowskim porjedže móže so jenož potom před rjadnymi sudnistwami přednjeć, hdyž su so z tym elementarne prawnostatne principy zranili a so rozsud na zranjenje tutych principow zložuje.

### § 2 Wutworjenje změrcowskeho wuběrka

- (1) Změrcowski wuběrk so wot hłowneje wólbneje zhromadźizny Domowiny wotpowědnje wustawkam Domowiny art. 13 wuzwoli. Přistajeni Domowiny kaž tež čłonojo zwjazkowneho předsydstwa abo druhich organow Domowiny njemóža być z čłonom změrcowskeho wuběrka.
- (2) Čłonojo změrcowskeho wuběrka wola ze swojich rjadow předsydu a městopředsydu.
- (3) Městopředsyda zastupuje předsydu w padže njepřitomnosće a/abo zajatosće.
- (4) Zarjad Domowiny staji změrcowskemu wuběrkej jednoho referenta jako sekretara, z dobom protokolanta, k dispoziciji.

---

<sup>1</sup> Muska forma měni wuraznje stajnje tež žónsku.

### § 3 Nadawki

- (1) Změrcowski wuběrk změruje konfliktne pady w zmysle wustawkow Domowiny, artikl 13, kotraž wustawki Domowiny a program Domowiny nastupaja. Změrcowski wuběrk předpožži hłownej zhromadźiznje resp. zwjazkowemu předsydstwu namjet za změrowanje konflikta.

### § 4 Zapodaće próstwy a jeje wobdźělanje

- (1) Změrcowski wuběrk skutkuje po dochadže pisomneje próstwy. Próstwa ma předmjet zwady konkretnje mjenować a wopodstatnić. Próstwarjej a přećiwnikej poda so mjezypowěsć wo dochadže próstwy w přiměrjenym času, najpozdžišo za 2 tydženjej.  
W tutej dobje ma předsyda změrcowskeho wuběrka zwólniweho člona změrcowskeho wuběrka zdobyć, kiž wjedže z woběmaj stronamaj změrcowsku rozmołwu do zahajenja změrcowskeho jednanja. Z tym poskići změrcowski wuběrk změrowanje konflikta bjez jednanja. Wobě stronje matej prawo, tutu rozmołwu wotpokazać.
- (2) Nastupa-li zwada rozsudy hłowneje zhromadźizny abo Zwjazkoweho předsydstwa Domowiny, ma so próstwa w běhu slědowacych 4 tydženjow změrcowskemu wuběrkej zapodać. Po dochadže próstwy rozsudži změrcowski wuběrk w běhu 6 tydženjow wo wašnju jeje wobdźělanja.
- (3) We wobzamknjenju wo wobdźělanju próstwy ma so termin za ertne jednanje postajić. Tutón ma so wobdźělenym (próstwarjej a přećiwnikej) na jednanju bjez komdženja, najpozdžišo 2 tydženjej do termina ertneho jednanja, posrědkować. Ertne jednanje ma so najpozdžišo 6 tydženjow po wobzamknjenju wo wobdźělanju próstwy přewjesć.
- (4) Namjety smědža so hač do rozsuda změrcowskeho wuběrka cofnyć.
- (5) Wopokaza-li so próstwa k zahajenju změrcowskeho jednanja jako njewoprawnjena, so wona wotpokaza. Rozsud ma so zapodarjej z mjenowanjom přičinow a z pokiwowom na prawniske srědki w běhu dweju tydženjow po wobzamknjenju zdžělić.
- (6) Přećiwo wotpokazanju namjeta na zahajenje změrcowskeho jednanja móže próstwar w běhu 6 tydženjow spřećiwenje z podaćom přičiny zapodać a wo wospjetne wobdźělanje prosyć.

### § 5 Zajatosć

- (1) Člon změrcowskeho wuběrka smě sebje samoho za zajateho wozjewić a swoje sobuskutkowanje na jednanju wotpokazać.
- (2) Wobdźěleni na jednanju smědža próstwu podać, jednotliwych člonow změrcowskeho wuběrka z jednanja wuzamknýć. Wo njej rozsudži změrcowski

wuběrk w tajnym wothłosowanju.

## § 6 Protokol

- (1) Protokol posedženjow wuběrka ma wobsahować:
  - termin a městnosć wuradźowanja kaž tež dnjowy porjad
  - mjeno nawody
  - přitomnosć člonow a hosći
  - mjenowanje próstwy z mjenom zapodawarja a datumom dochada
  - krótke komentary k wobjednanym wobsaham
  - wobsah doporuchenja na zwjazkowe předsydstwo
- (2) Protokol a/abo dalše podložki jednanjow přepodaja so přez předsydu změrcowskeho wuběrka k składowanju w zarjedže na zamołwiteho za datowy škit w zarjedže. Woni maja so třecim jenož we woprawnjenym padže a z dowolnosću wuběrka spřistupnić.

## § 7 Wobdžěleni na jednanju

- (1) Wobdžěleni na ertnym jednanju su próstwar a w próstwje ewtl. mjenowany přećiwnik. Na pisomnu próstwu jednoho z njeju smědža so dalši na jednanju wobdžělić. Wo tym rozsudzi změrcowski wuběrk. Změrcowski wuběrk smě po trěbnosći dalšich do jednanja zapřijeć, tež na próstwu wobdžělenych stronow.
- (2) Su-li wobdžěleni na jednanju gremije abo organy Domowiny, móža so tute w ertnym jednanju maksimalnje wot dweju člonow zastupować dać.
- (3) Wobdžělenym smě w jednanju jedna wosoba k pomocy być.

## § 8 Wobzamknjenja změrcowskeho wuběrka

- (1) Změrcowski wuběrk je z přitomnosću wjetšiny člonow wobzamknjenjakmany.
- (2) Rozsudy, to rěka namjety za změrowanje konflikta w zmysle artikla 13, wotrězk 3 wustawkow Domowiny, tworja so z wjetšinu přitomnych. Wobzamknje so zjawnje ze zběhnjenjom ruki, dalokož to wustawki hinak njepostajeja.
- (3) Předsyda změrcowskeho wuběrka informuje předsydu Domowiny a jednaćela wo wobzamknjenju změrcowskeho wuběrka.

## § 9 Ertne jednanje

- (1) Změrcowski wuběrk rozsudzi wo swojim doporuchenju w změrcowskim jednanju na zakładže ertneho wuradźowanja. Jenož w dorozumjenju próstwarja a jeho

přečiwnika smě so bjez njeju (bjez ertneho jednanja) namjet za změrowanje konflikta tworić.

- (2) Předsyda změrcowskeho wuběrka postaji městno a čas ertneho wuradźowanja.
- (3) Pisomne přeprošenje wobdžělenym na jednanju ma wobsahować:
  - městno a čas wuradźowanja
  - mjena člonow změrcowskeho wuběrka
  - mjena dalších wosobow, kiž so po § 7 (1) přeproša
  - změrcowski porjad
  - powučenje wo prawje, wěstych člonow změrcowskeho wuběrka wotpokazać směć
- (4) Próstwar a přečiwnik smětaj so we woprawnjenym padže zastupować dać. Wuměnjenje za zastupowanje je pisomna połnomóc.
- (5) Předsydka/předsyda změrcowskeho wuběrka nawjeduje ertne wuradźowanje a wudžěla prawo rěčenja.
- (6) Njewobdžěli-li so jedyn z wobdžělenych ani na druhim ertnym wuradźowanju, smě so wone w jeho njepřitomnosći přewjesć.
- (7) Wuradźowanja změrcowskeho wuběrka su njezjawne. Wo winowatosći mjelčenja so přitomni protokolarisce powuča.
- (8) Elektroniske natočenje je jenož za protokolowanje z wot wuběrka skazanej techniku dowolene. Wo takjim natočenju so na jednanju wobdžěleni informuja. Wužiwanje dalších techniskich nastrojow njeje dowolene. Natočenja so po wobkrućenju protokola a wotběženju doby spřečiwnjenja zniča.
- (9) Ertne wuradźowanje zakónči so ze stejišćom wobdžělenych. W kónčnym wozjewjenju smě so próstwa precizować. Poslednje słowo ma přečiwnik próstwarja.
- (10) Namjet za změrowanje konflikta so wot změrcowskeho wuběrka w tajnym wuradźowanju bjezposrědnje po zakónčenju ertnych wuradźowanjow twori.
- (11) Namjet za změrowanje konflikta je na próstwu wjazany. Wón smě so jenož na w změrcowskim jednanju předležace podložki a na wuslědki ertnych wuradźowanjow zložować.
- (12) Namjet za změrowanje konflikta a wobzamknjenje změrcowskeho jednanja smětej so, ma-li změrcowski wuběrk dalšu potrebu k jednanju, na přichodne posedženje přestorčić, dalokož so to z próstwu w jeje wobsahu znjese.
- (13) Namjet za změrowanje konflikta so bjezposrědnje po wobzamknjenju w posedženju próstwarjej a přečiwnikej z ertnym wopodstatnjenjom wozjewi. Wobzamknjenje a wopodstatnjenje matej w běhu 14 dnjow pisomnje předležec a so wot předsydy a dalšej člonow změrcowskeho wuběrka, kotraž staj so na jednanju wobdžěliť, podpisać. Rozsud so z wopodstatnjenjom, ručež móžno, wobdžělenym póscele.

## § 10 Nachwilny namjet za změrowanje konflikta

- (1) Změrcowski wuběrk smě, jeli naležnosć chwata, nachwilny namjet za změrowanje konflikta we wěcy a bjez porjadneho jednanja tworić.

- (2) Nachwilny namjet za změrowanje konflikta ma so w běhu 6 tydzenjow w porjadnym jednanju wobkrućić, hewak stanje so njeplaćiwu.

## § 11 Prawniske srědki

- (1) Spřećiwjenje přećiwu namjetej za změrowanje konflikta změrcowskeho wuběrka ma so w běhu 4 tydzenjow po wozjewjenju rozsuda pisomnje zapodać.
- (2) Za spřećiwjenske jednanje plaća prawidła změrcowskeho porjada.

## § 12 Nowe wobjednanje wotzamknjeneho jednanja

- (1) Změrcowski wuběrk móže wotzamknjene jednanje na próstwu dotalnych wobdźelenych znowa zahajić, jeli so fakty předpolaža, kotrež njesu za čas wobzamknjenja znate byli.
- (2) Jednanja, kotrež su so bjez wobzamknjenja přez cofnjenje próstwy zakónčili, njemóža so znowa zahajić.

## § 13 Kóšty

- (1) Změrcowski wuběrk sej wot wobdźelenych (próstwarja a přećiwnika) narunanje kóštow nježada.
- (2) Wobdźelenym so nastate kóšty přez změrcowski wuběrk njezarunaja.
- (3) Nastupajo wudawki (jězbne kóšty, posedženski pjenjez) su člonoyo změrcowskeho wuběrka člonam zwjazkoweho předsydstwa runostajeni.
- (4) Materielne a financne srědki za skutkowanje změrcowskeho wuběrka maja so přez zarjad zaručić.
- (5) Městnosć zeńdženjow změrcowskeho wuběrka je Serbski dom w Budyšinje. Wuwzaća su móžne.

## § 14 Kónčne postajenja

- (1) Po potrebjce je změna tutech wustawkow přez změrcowski wuběrk kóždy čas móžna. Wo plaćiwosći tutech změnow rozsudži zwjazkowe předsydstwo abo hlowna zhromadźizna Domowiny.
- (2) Jednotliwemu člonaj změrcowskeho wuběrka přewostajene podložki su wobsydstwo Domowiny. Z nimi ma so dowěrliwje wobchadžeć. Při zakónčenju jeho sobudžěla maja so tute podložki wrócić. Ze swójskimi zapiskami ma so wobkedžbujo datowy škit wobchadžeć.
- (3) Předležacy změrcowski porjad nabywa dnja 12.04.2014 plaćiwosć.

*Změrcowski porjad schwali so na posedženju zwjazkowego předsydstwa dnja 12.04.2014 w Budyšinje a nabudže z tym swoju płaćiwosć.*